

海運續案

驗米大臣

臣孫

臣慶

跪

奏為遵

旨前赴天津驗收海運南糧先期恭請

聖訓事竊本年正月十五日臣部奏請

欽派驗米大臣一摺奉

硃批著派孫

慶

屆期前往驗收欽此欽遵在案臣

等查海運南糧到津向由兩江總督直隸總督各派

委員駐津設立總局其應辦一切事宜理宜先事豫

籌督率妥辦伏查道光二十八年係於三月初二日請

訓率同隨帶司員起程其時上海沙船尚未探有進口消息

此次自應照辦酌於三月初間起程前往至海洋風信靡常萬一風帆順利能於本月底探有進口信息臣等即行前往不必拘定三月初間日期合併聲明除俟將屆起程再行恭摺具報起程日期外理合先行跪請

聖安恭聆

訓誨是否有當伏乞

皇上聖鑒謹

奏咸豐二年二月十八日具奏本日奉

旨知道了欽此

山東巡撫臣劉源灝跪

奏為備陳籌辦本年海防情形仰祈

聖鑒事竊照東省海防自道光三十年間經前撫臣陳

奏改水師鎮將增設弁兵添造戰船係為整頓之計上年新營立定鎮將陸續到任戰船亦由粵東成造回東各事甫有就緒而新兵未及訓練七月間突有粵匪剽佔戰船之事水師遊擊副將或已畏罪自盡或已叅革治罪鎮臣陳世忠守備黃富興相繼追賊南行水師為之一空幸值冬令撤防暫安無事現屆春融指日南風司令粵匪布興有雖經投誠而沿海兇

徒恐未必止此一股難保不乘風聯鯨北駛本年江
省蘇松等府州漕糧均由海運洋面防衛事宜更較
常年喫重溯查道光六年及二十八年江省海運經過
東洋一切稽查防護厯有舊章臣現亦照案先期籌
備如登州府屬榮成縣之石島為全洋扼要擬派委
登州府知府汪承鏞督率該縣文武往來彈壓此外
如文登縣之威海福山縣之烟台蓬萊縣之廟島以
及榮成縣之俚島等處亦擬由省遴委幹練州縣佐
貳等官分駐巡防並飭沿海各州縣團練壯勇分扼
口岸以杜內匪偷越惟海口究察責在文員洋面護

送責在水師現在水師一鎮三營僅止前營實缺遊擊羅朝輔一人舊有戰船年久失修不堪駕駛二十年添造之紅頭快船亦止能內港追襲不能駛出大洋衝鋒臨敵上年被賊先後刦佔之新造廣艇開風等船雖經在浙省繳回九隻奉

旨飭令黃富興押回而該守備因另有委造

盛京戰船於奉飭知以前由浙徑行赴粵經前撫臣陳飛檄飭令折回現尚未據稟報回浙且聞在浙省收回各船多有破損是否尚堪修補駕回備用抑竟湏拆造之處似難懸擬必須該守備回浙後飭令會同

上
浙省委員勘明情形稟覆到日方能酌辦約計開洋
以前實已趕辦不及是現在情形既無鎮將又無師
船而百餘萬

天庾正供指日連檣北來設有疎虞所關匪細臣通盤籌
計所需戰船尚可循照前數年辦理成案不惜經費
在沿海各口岸募雇商船頂替酌配兵勇巡防惟水
師將領非陸路武員所能庖代查新任水師登州鎮
臣武迎吉係上年十二月間由江省京口協副將奉
旨簡放文登協水師副將陳勝元後營水師遊擊陳廷芳
係上年十月間由部掣補除陳勝元旋經升補江蘇

福山鎮總兵其遺缺尚未經部掣補外其餘各員現時均未到任相應請

旨飭催新任登州鎮臣武迎吉並

勅部飛催新任後營水師遊擊陳廷芳迅速來東任事以專責成其文登協水師副將亦請由部即行掣補俾免曠誤抑臣更有請者查道光六年江省海運北來該省遴派武職大員護送並派兵六百名沿海巡防二十八年亦派武職大員護送加派兵一千名本年年海運兩江督臣陸建瀛等以沿海巡防各有專責毋庸派員調兵押送應咨直隸山東等省接護等因經

戶部議准各會在案臣伏思兩江督臣議改章程自係為各專責成以杜諉卸起見惟查道光六年東省洋面甚為平靜即二十八年間雖有閩匪闖入洋氛亦未甚熾而上兩次海運過東尚資江省兵威以備不虞三十年以後閩粵兇匪諳習東洋形勢乘虛規伺如上年之刦佔戰船撲攻口岸勢甚猖獗現值東省水師無將無船即多雇商船酌配兵勇分段巡護亦恐聲勢單弱不足以資捍衛臣非敢妄冀推諉而以本年情形參較上兩屆舊章不容不思患豫防倍加慎重可否籲懇

天恩俯賜

勅諭兩江督臣仍循舊章於海運開行時遴委武職大員
帶兵北來防衛俾東省水師藉資聲威以免疎虞之
處出自

聖裁為此恭摺具

奏伏乞

皇上聖鑒謹

奏咸豐二年二月二十三日奉

上諭劉源灝奏籌辦海防情形一摺已明降諭旨令武迎
吉等迅赴新任矣本年海運山東省水師將弁不敷巡

防自係實在情形惟請飭江蘇遴派武職大員北來防
衛一節業據陸建瀛等奏定章程並分咨直隸山東等
省沿途接護又據稱飭令江蘇在籍員外郎王承基安
徽候補知縣沈譽來等雇募水勇分為頭尾兩幫督押
糧米起運是江蘇已有勇船防護不致漫無約束況米
船現經陸續開洋若此時始令派委大員轉恐遷延時
日緩不濟急該署撫仍照現定章程妥為辦理毋庸再
議更張至登州鎮總兵武迎吉計日即可到任該省水
師情形應如何整頓之處即著與該鎮隨時會商籌辦實
力操防毋得稍存諉卸致有疎虞也將此諭令知之欽此

兩江總督臣陸建瀛江蘇巡撫臣楊文定跪
奏為恭報海運漕糧全數兌竣跟接前幫一律放洋謹
再由驛馳

奏仰祈

聖鑒事竊照本年蘇松常鎮太五府州屬漕白糧米全由
海運截至正月三十日二月二十日止兩次兌竣沙
船六百餘號共裝起運交倉漕白正耗米六十八萬
四千二百餘石業經先後

奏報在案茲據蘇松太道吳健彰等詳報三月初三日
止將各屬應運漕白等米全行兌裝完竣合計連前

解兌漕糧正耗米一百七萬八千六百石零白糧正
耗米八萬一千三百三十一石零內除沙船耗米八
萬五千一百四十石零津通食耗二米二萬七千九
百四十一石零實在交倉漕白正耗米一百四萬六
千二百五十五石零共裝沙船八百餘隻其應給沙
船水腳等項銀兩均經發給清楚仍飭委員查明各
船隨帶器械趕緊跟幫開行放洋北上詳請具

奏前來伏查沙船放洋全伏風色現值天氣晴和如果
南風順利船行可期穩速所有初次裝運沙船現據
崇明縣稟報放洋二百九十隻在後未放各船恐有

疎虞臣楊文定即日親赴上海督催嚴飭各沙船趕
緊跟幫行走毋任稍有稽延並令勇船帶領水勇護
送出洋自余山至山東石島為止一面飛咨本省隣
省沿海各鎮營督帶兵船嚴密巡護以聯聲勢現在
江省洋面安靜堪以仰慰

宸厯除將船號米數咨部查覈外合將海運米石全行兌
竣開行日期謹照案會同漕臣楊殿邦恭摺由驛馳
奏伏乞

皇上聖鑒謹

奏咸豐二年三月十五日奉

上明

卷三

殊批知道了欽此

五十八

倉場侍郎朱 琬

奏為委派大通橋監督於海運漕糧到通時分班赴壩
照料查催以杜弊端而昭迅速仰祈

聖鑒事竊照大通橋滿漢監督二員專司轉運歷年漕糧
由通運橋經抽查御史督同該監督等掣量斛面遇
有短欠著落各經紀賠補一面督率車戶人等將應
進各倉糧石分投轉運歷經遵辦在案今年河海並
運前經臣等奏派滿坐糧廳毓鍾隨同臣慶赴津驗
收海運糧石在通惟漢坐糧廳一員若海運與東糧
並到照料恐有未周查起運漕糧由裡河各閘搬抗

過載沿途無不拋灑短欠及乘間偷漏情弊甚至石壩號房積壓糧袋各閘積壓載船輪轉不能迅速必須認真查催不任稍滋流弊方臻周密臣已嚴飭坐糧廳詳細查驗務期一律乾潔至由壩運橋米石應請派委大通橋滿漢監督中留一員在橋抽掣分一員在壩輪流照料並沿閘一帶往返稽查如有前項弊端立即稟明懲辦如此層層稽查催儆轉運既能迅速而閘壩等處亦可清其流弊是否有當伏祈

皇上聖鑒再臣慶現赴天津驗收海運糧石未及列銜
合併聲明謹

奏咸豐二年三月十四日奏本日奉

旨知道了欽此

驗米大臣臣孫

臣慶 跪

奏為遵

旨赴津驗收海運南糧謹將現辦情形恭摺奏祈

聖鑒事竊臣等於本月初四日由各路起程初十日行抵
天津直隸委員清河河道譚廷襄亦於是日抵津會同
天津道張起鵠天津府錢炘和等辦理總局事務臣
等督飭隨帶司員臣部郎中董醇主事振麟王友端
成琦坐糧廳毓鍾並該鎮道等熟商妥辦其先期哨
探乘潮迎護導引進口挽排水次查驗米色監視斛
收配給撥船疎通河道收發器械催空出口一切事

宜由該鎮道等遴委丞倅將弁各司其事次第整齊
本年沙船放洋較蚤先於本月初三日接據天津鎮
道呈報沙船抵津信息現在沙船陸續進口截至本
月十六日止業經到津共計沙船一百二隻計裝漕
白糧米十三萬三千餘石其在後各船聞已源源而
來現在江蘇委員同知梁逢辰朱鈞同帶鐵斛來津
據稱蘇松糧道倪良燿現已在途不日可到臣等督
飭該司員會同坐糧廳暨江蘇直隸兩省委員三面
眼同較明斛隻一面催令撥船移近沙船臣等率同
司員坐糧廳等親赴河干查驗米色尚屬乾潔即令

趕緊斛收分起撥運此後續到船隻亦即逐日逐船
認真查驗飭令隨驗隨收俾得早為運通以期迅速
歲事所有驗收海運南糧現辦情形理合恭摺具奏
伏乞

皇上聖鑒謹

奏

咸豐二年三月十八日奉

硃批知道了欽此

倉場侍郎臣朱 跪

奏為海運漕白糧米抵通開斛起卸日期恭摺奏
聞事竊照本年江蘇省蘇松常鎮太四府一州漕白糧米
全行海運裝載沙船運抵天津由

欽差大臣查驗兌裝剝船於三月二十二日開行北上四
月初一日抵通臣即擇吉於初二日敬謹祭祀

河神開斛起卸一面行令坐糧廳隨到隨驗不許片刻
停留其膳空剝船仍飭司漕員弁無分晝夜督催迅
速回津接運以資輪轉俾免貽誤臣正在辦理間據
山東省德州衛首幫於初二日挽抵通壩在後各幫亦

已跟接北上 臣仍令坐糧廳同海運漕糧一併查驗
分別起卸並飭大通橋監督趕緊轉運進倉毋稍稽
遲所有海運漕白糧米及山東省幫船陸續抵通開
斛日期理合恭摺奏

聞伏祈

皇上聖鑒再 臣慶 現赴天津驗收海運糧米未經列銜

合併聲明謹

奏咸豐二年四月初五日奏本日奉

旨知道了欽此

倉場侍郎臣朱嶠跪

奏為遵

旨查明覆奏仰祈

聖鑒事四月二十九日奉

上諭給事中志魁奏興平倉掣驗海運交倉米石每袋均有短少請飭查辦一摺著倉場侍郎確切查明據實覆奏欽此欽遵到臣衙門臣查定例經紀運米到大通橋交與車戶轉運進倉每十萬石定掣欠二百石車戶每十萬石定掣欠二百五十石又道光八年經前任倉場侍郎松廷等奏掣欠逾額章程一摺奉

諭松廷等議奏近來經紀掣欠米石過多諭令該倉場侍
郎妥議章程具奏茲據奏從前掣欠逾額之米均經戶部
咨准令該經紀等折交銀兩著照所議准將掣欠在額內
者仍照收買餘米例其掣欠逾額者援照歷次成案比照
市價議增五成令其折價交銀每年金漕完竣後由大通
橋監督覈明經紀車戶額內額外各數目報部應交銀兩
一律完交嗣後著照新定章程辦理等因欽此欽遵在案
故經紀由石壩運米至大通橋經抽查御史每五十
袋抽掣一袋一袋短少五十袋照數罰賠登記欠單
將原袋交與車戶分運各倉各倉御史監督抽掣如法

除經紀短欠外再有短欠著落車戶賠補非經大通
橋掣斛之後經紀業已賠補清楚再令車戶拉運進
倉也故必俟漕糧完竣之時通盤覈算分晰經紀掣欠
若干車戶掣欠若干在額內者照收買餘米例賠補
在額外者即照市價酌增五成折銀賠補立法綦嚴
所以杜偷漏拋撒之弊歷經遵辦在案故掣欠向來
所有而未有如本年之無袋不短每袋短至六七升
之多者此項短欠米石例應經紀車戶賠補不為無
著然非徹底根究誠如該給事中所奏積至歲千累
萬於倉儲大有關礙臣嘗親赴石壩屢經查驗抽掣

斛面多有不足隨將經紀斛手人等嚴行枷責懲辦
務令添足再行過橋並嚴訊因何短欠如許之多據
各經紀供稱實因海運米石類多潮熱起載剥船嚴
密封釘及至抵通屢奉

欽差大人嚴催起限緊迫河干不能風晾入袋轉運沿閘
搬抗節次過風米身收縮車路顛簸復經橋倉等處
出袋掣量短欠逾多役等勢處無可如何實在賠累
不堪等語臣悉心體察各處詢訪尚屬實在情形在
下役人等藉端滋弊難保必無而來源未清伊適有
所藉口相應請

旨敕下驗米大臣督率司員認真查驗遇有潮潤發熱之
米即令全數風晾乾透再行兌剝運通以昭慎重而
杜口實臣仍隨時查察並嚴飭坐糧廳大通橋監督實
力防範嚴禁短量偷漏使水等弊庶於倉儲有裨掣
欠米石統俟漕糧全數進倉後仍照舊章覈明經紀
車戶額內逾額各若干分晰咨部照例賠補附著查明緣
由理合恭摺據實覆

奏伏祈

皇上聖鑒謹

奏咸豐二年五月初六日内閣奉

上諭朱嶧奏覆查興平倉海運米石短少請飭驗米大臣
認真查驗一摺著戶部詳覈速議具奏欽此

戶部謹

奏為遵

旨速議具奏仰祈

聖鑒事咸豐二年五月初六日奉

上諭朱嶧奏覆查興平倉海運米石短少請飭驗米大臣認真查驗一摺著戶部詳覈速議具奏欽此欽遵於初七日抄出到部據原奏內稱四月二十九日奉

上諭給事中志魁奏興平倉掣驗海運交倉米石每袋均有短少請飭查辦一摺著倉場侍郎確切查明據實覆奏欽此欽遵到臣衙門臣查定例經紀運米到大通橋

交與車戶轉運進倉每十萬石定掣欠二百石車戶
每十萬石定掣欠二百五十石又道光八年經前任
倉場侍郎松廷等奏掣欠逾額章程一摺奉

上諭松廷等議奏近來經紀掣欠米石過多諭令該倉場侍
郎妥議章程具奏茲據奏從前掣欠逾額之米均經戶部
咨准令該經紀等折交銀兩著照所議准將掣欠在額內
者仍照收買餘米例其掣欠逾額者援照歷次成案比照
市價議增五成令其折價交銀每年全漕完竣後由大通
橋監督核明經紀車戶額內額外各數目報部將應交銀
兩一律完交嗣後著照新定章程辦理等因欽此欽遵在

案故經紀由石壩運米至大通橋經抽查御史每五十袋抽掣一袋一袋短少五十袋照數罰賠登記欠單將原袋交與車戶分運各倉各倉御史監督抽掣如法除經紀短欠外再有短欠著落車戶賠補非經大通橋掣斛之後經紀業已賠補清楚再令車戶拉運進倉也故必俟漕糧完竣之時通盤核算分晰經紀掣欠若干車戶掣欠若干在額內者照收買餘米例賠補在額外者即照市價酌增五成折銀賠補立法最嚴所以杜偷漏拋撒之弊歷經遵辦在案故掣欠向來所有而未有如本年之無袋不短每袋短至六七

升之多者此項短欠米石例應經紀車戶賠補不為
無著然非澈底根究誠如該給事中所奏積至盈千
累萬於倉儲大有閼礙臣嘗親赴石壩屢經查驗抽
掣斛面多有不足隨將經紀斛手人等嚴行枷責懲
辦飭令添足再行過橋並嚴訊因何短欠如許之多
據各經紀供稱實因海運米石類多潮熱起載剝船
嚴密封釘及至抵通屢奉

欽差嚴催起限緊迫河干不能風晾入袋轉運沿開搬抗
節次過風米身收縮車路顛簸復經橋倉等處出袋
掣量短欠愈多役等勢處無可如何實在賠累不堪

等語臣悉心體察各處詢訪尚屬實在情形在下役人等借端滋弊難保必無而來源未清伊適有所藉口相應請

旨敕下驗米大臣督率司員認真查驗遇有潮潤發熱之米即令全數風晾乾透再行兌剝運通以昭慎重而杜口實臣仍隨時查察並嚴飭坐糧廳大通橋監督實力防範嚴禁短量偷漏使水等弊庶於倉儲有裨掣穴米石統俟漕糧全數進倉後仍照舊章核明經紀車戶額內逾額各若干分晰咨部照例賠補等語臣等查海運成案曾經奏明米質之乾潔總以到津

時查驗為憑是以此次漕糧抵津由驗米大臣會同倉場坐糧廳直隸江蘇各委員眼同查驗明確如沙船米有霉變即由江蘇委員責令該商等賠補如係好米即由坐糧廳取其該經紀米色乾潔米數無虧切結督令斛收押運赴通抵通後由裏河轉運大通橋均係經紀料理如有短少潮濕經大通橋及應行收米之倉監督查出均惟經紀是問不得牽涉外河剝船更不得牽涉原裝沙船等因奏奉

諭旨准行在案是界限既已劃清斯弊竇不容牽混今倉場侍郎因興平倉海運米石短少遵奉

諭旨確查覆奏所稱定例經紀由壩運橋車戶由橋運倉
其掣欠數目統俟漕糧完竣之時通盤核算經紀車
戶掣欠各若干在額內者照例價賠補在額外者照
市價酌增本係申明舊例以為追賠短少地步應毋
庸議至所稱興平倉短欠之米據各經紀供稱因海
運米石類多潮熱及至抵通屢奉

欽差嚴催起限緊迫河干不能風晾入袋轉運米身收縮短
欠愈多請

旨飭下驗米大臣督率司員認真查驗遇有潮潤發熱之
米即令全數風晾再行兌剝等語臣等查海運章程

劃清界限原期各清各弊庶免臨時牽混今興平倉米石如果在津起載時即屬潮熱何以承運之經紀肯出具米色乾潔米數無虧切結且漕糧抵通例由坐糧廳一面驗收一面飭令經紀入袋轉運如果米質潮濕何以該坐糧廳草率驗收並不向承運之經紀嚴行究辦迨至由壩運橋由橋運倉層折既多更滋弊竇該侍郎既稱借端滋弊難保必無自當責成坐糧廳及大通橋各監督逐層分別查辦何以於查倉給事中志魁奏叅米石短少之後僅問之借端滋弊之人即據其一面之詞謂驗米之初類多潮熱率爾含混具

奏且既據該侍郎奏稱親赴石壩抽掣斛面多有不足飭令添足再行過橋等語是該侍郎業已查驗得實何以並不將短少斛面之人嚴叅治罪照數追賠轉藉口於米身收縮曲為開脫以上情節均應令該侍郎據實明白迴奏至所稱抵通後

欽差嚴催起限緊迫一節臣等查該侍郎奏報起過糧數自四月初一日起至二十日止每日僅起米一萬餘石如再按照例限斛收三萬石不知又將作何藉口該侍郎所奏俱未核實當此整頓倉務之際經紀人等即使嚴加防範猶恐百弊滋生若再寬為縱容更

覺拜無忌憚相應請

旨飭下倉場侍郎朱 嚴飭坐糧廳驗收米石如查有潮濕虧短諸弊即將作弊之人送部治罪照案追賠至由石壩轉運大通橋由大通橋分運各倉務各釐剔弊端實力訪察斷不可意存迴護使經紀車戶人等有所推諉如經管各官有意袒護即將承辦之員據實叅奏如此層層防範庶倉儲稍有裨益所有臣等速議緣由是否有當伏乞

皇上聖鑒訓示謹

奏請

旨

咸豐二年五月十三日具奏本日奉

上諭前因倉場侍郎覆奏興平倉海運米石短少各情當
交戶部詳核速議具奏茲據該部奏稱查海運成案漕
糧抵津由驗米大臣會同倉場坐糧廳直隸江蘇各委
員眼同查驗由坐糧廳取具該經紀切結督收運通
後由裏河轉運大通橋如查有短少潮濕等弊均惟
經紀是問現在興平倉米石如果在津時即有弊混該
經紀何肯出具切結迨至抵通驗收該坐糧廳何以率
行轉運且既經查倉給事中叅奏該侍郎又將斛面短

少查驗得實何以不將舞弊之人嚴叅治罪照數追賠
輒據經紀等一面之詞歸咎於天津驗米大臣著朱
嶧據實明白廻奏當此整頓倉務之際若不嚴加懲創
更恐肆無忌憚即著該侍郎等嚴飭坐糧廳驗收米石
如查有潮濕虧短等弊即將舞弊之人送部治罪照例
追賠至由石壩轉運大通橋後分運各倉務各釐剔弊
端實力訪察如經營各官意存廻護亦著據實叅奏毋
稍徇隱餘依議欽此

戶部謹

奏為海運剝船通壩驗收遲滯請

旨嚴催以肅漕政仰祈

聖鑒事竊維本年河道阻滯重運維艱幸賴海運漕糧稍
資接濟在受雇之沙船急公應募航海而來尤當迅
速驗收俾得及早回空別謀生計而天津驗收之運
速總以運通之剝船能否輪轉為憑前因東糧同時
並到臣等以剝船抵通交卸後仍須折回天津裝運
與東糧交卸後無須再運者不同當即移咨倉場嚴
飭坐糧廳先儘剝船驗卸不准片刻停留並經

欽差驗米大臣於驗收起運情形摺內奏奉

諭旨准行各在案嗣據驗米大臣咨稱漕糧抵通坐糧廳

每日例應起米三萬石現在通壩每日僅起米萬餘石並有停驗日期以致剝船沿河停泊待驗積壓至二十餘里之遙沙船人等守候半月之久尚未掛剝紛紛攔與呈控環跪哀求在津辦理十分掣肘等語又經臣部移咨倉場將指飭各情形迅即咨報驗米大臣查覈並咨覆臣部以憑覈辦等因亦在案茲據倉場咨稱現在東豫二省幫船已經停驗外河起米大通橋進倉每日均符三萬石之數惟裏河未能足

額已將石壩州判奏叅摘頂咨覆前來臣等查向例漕糧抵通坐糧廳驗收起卸過壩由石壩州判督催轉運大通橋分運各倉各有專司不容推諉今停驗之剝船積壓至二十餘里之遙是驗收既已遷延轉運何由迅速臣等按倉場五日奏報收過海運糧數覈算自四月初一日起至二十日止每日僅起米一萬餘石自二十一起至二十五日止每日亦僅起米二萬餘石即將起過東糧之十一萬七千餘石算亦難符每日三萬之數彼時日永天晴起卸得手該坐糧廳既未遵照奏案認真趕辦亦未遵照例限如

數斛收遂致數百隻航海之沙船紛紛呈控尚復成何事體且剎船封固釘堅無從風瞭悶蒸日久微變堪虞設遇陰雨連綿米質受傷誰職其咎當此河運艱難之際若再不激發天良破除情面何以革積習而挽頽風相應請

旨敕下駐通倉場侍郎嚴飭坐糧廳遵照每日起米三萬石定例隨到隨驗以速補運僅因循不振仍復遷延或縱容經紀人等故意刁難阻撓海運為需索河運旗丁地步即行據實嚴叅勿稍迴護並將因何每日起米不足三萬石之處切實查明具奏至大通橋各

官應轉飭一體遵照迅即分運以免遲滯臣王
現署順天府尹一面劄行通永道嚴飭石壩州判
於坐糧廳驗收後迅速督催轉運不准片刻稽延如
此逐層趕辦庶沙船可以及早回空不至有妨本業
矣是否有當伏乞

皇上訓示謹

奏請

旨咸豐二年五月初二日內閣奉

上諭戶部奏海運剝船通壩驗收遲滯一摺定例漕糧抵
通坐糧廳驗收起卸每日應起米三萬石茲據奏稱本

年海運剝船通壩驗收每日僅一萬餘石或二萬餘石以致剝船停泊待驗積壓致二十餘里之遙該坐糧廳並未遵照例限如數斛收致令航海沙船不得即早回空辦理殊未妥協著交部議處仍著倉場侍郎嚴飭該廳員等隨到隨驗以速補運倘仍復遷延或縱容經紀人等故意刁難為需索地步即著據實嚴叅其大通橋登官亦飭一體遵照迅速轉運並將因何每日不足三萬石之處查明具奏至石壩州判有督催轉運之責著順天府府尹嚴飭該州判於坐糧廳驗收後迅速催轉運毋仍再有稽延欽此

倉場侍郎臣朱崙跪

奏為遵

旨查明具奏仰祈

聖鑒事五月初五日准戶部行知本部奏催海運剝船到
通迅速驗收一摺於五月初二日具奏本日奉

上諭戶部奏海運剝船通壩驗收遲滯一摺定例漕糧抵
通坐糧廳驗收起卸每日應起米三萬石茲據奏稱本
年海運剝船通壩每日僅一萬餘石或二萬餘石以致
剝船停泊待驗積壓至二十餘里之遙該坐糧廳並未
遵照例限如數斛收致令航海沙船不得及早回空解

理殊未妥協著交部議處仍著倉場侍郎嚴飭該廳員等隨到隨驗以速補遲倘仍復遷延或縱容經紀人等故意刁難為需索地步即著據實嚴叅其大通橋各官亦飭一體遵照迅速轉運並將因何每日不足三萬石之處查明具奏至石壩州判有督催轉運之責著順天府府尹嚴飭該州判坐糧廳驗收後迅催轉運毋任再有稽延欽此欽遵到臣查河運糧船例有到通回空限期海運例無到通回空限期河運例與無閘之年比較遲早海運例不比較遲早道光二十八年欽奉

上諭海運河運兼管並不得顧此失彼故臣於奏報開斛日

期摺內聲明海運奏報同日並到飭令坐糧廳一併
驗收在案嗣接戶部來咨內稱東豫二省漕糧同時
並到必須先儘海運剝船驗卸事涉兩歧權衡酌辦
乃擬為先驗海運兩日後驗東糧一日無論同時並
到者先儘驗收即後來者已儼然居上矣若竟將東
糧停擱不驗未免顯背舊章且河面窄狹幫船排列
在前剝船越次擁擠恐其阻塞運路欲速反遲此東
糧之不能相間一驗有驗東糧之日故海運有停糧
之日也誠使起卸得手次第趕辦自足以資周轉而
符例限無奈河乾水淺自小河口以上壩樓以下深處

一尺六七寸淺處一尺四五寸剝船既提不進前釣
載船又不敷浮送觀此情形幾於束手無策設法等
辦不惜重價另僱民間小船陸續轉運初時船隻短
少不敷應用幸東豫幫船帶有小剝腳船驗卸騰空
加價添僱乃復稍稍增益而船身短小所載不過四
五十石晝夜輪回亦不能足三萬石之數兼以米色
參差潮熱霉變者所在多有若一意求速草草了事
或將溼米朦混濫收迨至入倉朽爛虧折誰職其咎
查驗米色係坐糧廳專責不敢不小心慎重逐船挨
倉詳驗未免稽遲此四月十九日以前每日起米僅

萬餘石至二萬石不能足三萬石之實在情形也查
石壩土壩報單二十日至二十四等日外河起米實
已趕上洪斛三萬石外有平斛白糧二千石若俱以
平斛核算已在三萬八九千石被部臣刪去白糧一
層而將少起之日與多起之日挪前移後籠統核計
故不足三萬石耳二十五二十六日天津總單未到
無憑驗收起米不足三萬石二十七二十八二十九
等日起米三萬石已將海運到通剝船掃數驗卸完
竣並無積壓三十日五月初一日脫空初二日至初
十等日每日到通剝船僅止一起間有脫空之日每

起船一百餘隻裝平斛漕糧二萬餘石核計洪斛一萬六千餘石不堪起卸者千餘石此又起米不足三萬石兼驗東糧之原委也查楊村額設官民剝船二千餘百隻起運白糧例應另僱民船不在此數如果購備齊全循序漸進陸續騰空星夜折回何致不敷輪轉使

欽差有停收待剝之虞計此時沙船米數無多在津剝船業已有盈無絀據楊村汛把總王純稟報楊村通判於五月初七日已將回空船截留歸次矣臣惟有嚴飭坐糧廳將東豫二省軍船加緊驗收以符例限剝

船隨到隨驗壩橋各處一體飭遵如敢怠緩即行據實嚴叅而由石壩過載裏河實為運務關鍵河水既充船隻轉運如果奮勉圖功何難日行三萬而部臣謂驗收既已遷延轉運何由迅速不知轉運之勤惰但視存積之多寡號房無米則可歸咎於外河之起卸不速今按石壩報單詳查該處運數多不過二萬三四千石而積壓在號者至六七萬八九萬之多一處積壓則各處阻滯以致橋上短米進倉河下乏袋起米重重貽誤厥咎難辭此臣於四月二十七日將石壩州判吳元忭奏叅摘頂之原委也至下役人等

借端需索誠恐難免業經臣出示嚴禁並諭令押運
員弁查拿船戶扭稟從重懲處在案若縱容經紀人
等故意刁難阻撓海運為需索河運旗丁地步該員
即畏天良決不至此除將各處報單送部查核外所
有切實查明緣由理合恭摺具

奏伏乞

皇上聖鑒謹

奏咸豐二年五月十六日奉

上諭朱嶧奏遵旨查明海運米石起卸情形一摺此次海
運米石由天津剝運抵通較之豫東漕糧起卸尤宜迅

速據該侍郎查明坐糧廳等尚無有意積壓情事惟當
大雨時行之際若每日起卸不足三萬石之數必致輪
轉不及且易啟偷漏需索等弊著朱嶧嚴飭廳員迅速
催卸不得藉詞推諉有誤正供倘經紀人等故意刁難
即著嚴拿懲辦其石壩州判並著督飭趕辦如有遲延
一併叅奏欽此

倉場侍郎臣朱嶠跪

奏為遵

旨據實明白迴奏仰祈

聖鑒事五月十六日准戶部行知本月十三日奉

上諭前因倉場侍郎覆奏海運米石短少各情當交戶部
詳覈速議具奏茲據該部奏稱查海運成案漕糧抵津
由驗米大臣會同倉場坐糧廳直隸江蘇各委員眼同
查驗由坐糧廳取具該經紀切結督收運道後由裏河
轉運大通橋如查有短少潮濕等弊均惟經紀是問現
在興平倉米石如果在津時即有弊混該經紀何肯出

具切結迨至抵通驗收坐糧廳何以率行轉運且既經查倉給事中叅奏該侍郎又將斛面短少查驗得實何以不將舞弊之人嚴叅治罪照數追賠輒據經紀等一面之詞歸咎於天津驗米大臣著朱嶠據實明白迴奏欽此臣跪讀之下不勝悚惶竊漕糧抵津大臣如何會驗經紀何以出結臣不得而知也至抵通驗收據坐糧廳每日稟報查驗得海運漕糧凡起米質乾潔者飭令經紀趕緊起卸其中或間有潮濕或十數船潮熱或數十船潮熱情形輕者飭令隨瞭隨起情形重者飭令上岸風瞭伏驗再起未嘗率行轉運若承運

之經紀遠在天津當時未及提究至斛面有無短少非該廳一人查照所能周臣不時親至壩樓抽掣斛面多有不及即將該經紀斛手人等隨時枷責嚴行示懲飭令添足再行過橋時照數賠補無待於追若一升一合紛紛嚴叅送部雖夏日舒長恐亦不勝其煩瀆至與平倉短少米石曾經臣申明俟漕糧全數進倉仍照舊章覈明確數咨部照例辦理國法具在何能借口於米身收縮曲為開脫惟經紀車戶人等雖屬賤役當運務吃緊之際亦資其力若一查有短少即將舞弊之人嚴於治罪照數立追竊恐

短欠人多送部者去其大半一時召募不及必得公
事遲悞其咎誰歸借端滋弊下役之積習牢不可破
然使無端可借弊何由滋短少潮濕等弊均惟經紀
是問則釐弊之端不能不問之滋弊之人當臣查閱
之時據該經紀供稱虧折各情節雖係一面之詞若
遽斥為狡飾壅於

上聞轉不足以折服其心

奏請

飭下驗米大臣督率司員認真查驗正所以闢竄役之罪敢
歸咎也謹據實明白迴

奏伏祈

皇上聖鑒謹

奏

咸豐二年五月二十日內閣奉

上諭據朱嶠迴奏海運米石短少情形與戶部前奏兩歧
著派恩華彭蘊章秉公確查據實具奏欽此

臣恩華 臣彭蘊章 跪

奏為遵

旨查奏事本月二十日奉

上諭據朱嶠廻奏海運米石短少情形與戶部前奏兩歧
著派恩華彭蘊章秉公確查據實具奏欽此 臣等於次

日

陛辭後即於二十二日帶同兵部司員祥奎程誠工部司
員錫惠軍機章京陳鴻翊前往通州倉場衙門傳到
坐糧廳汪潤並經紀人等查詢先據倉場侍郎呈出
坐糧廳毓鍾在天津驗米逐日稟報公文內開每日

收米均間有米質蒸熱發紫字樣是海運米色原不能盡純又據汪潤呈出在通驗收米石清冊有全船潮濕者有一船潮濕者均經挑晾後再行驗收是在津不過蒸熱到通始見潮濕其為中途剝船使水無疑查海運章程經紀於出結後米之潮濕虧短皆惟經紀是問不得別有推諉此次興平倉短米業經該侍郎奏請照例於全漕完竣時著落經紀車戶追賠已由戶部覈准此外各倉如有短少亦應一律辦理至該侍郎原奏據經紀供稱屢奉

欽差嚴催起限緊迫河干未能風晾以致轉運後米身收

縮等語提訊經紀黑耀明等供亦相同臣等竊思海運為一時救急之務若任聽經紀等遲延起運苦累沙船設或再行海運沙船將視為畏途不得不存遠慮未可概事拘泥況值海運米石在津尚未潮濕到通後坐糧廳驗有潮濕仍加挑晾與該經紀所供亦不相符其經紀在津出結係屬向例該侍郎尤不當諉為不知雖業經到壩抽查將斛面不足之經紀斛手枷責當時即令賠補尚非有心徇庇惟於倉米短少不肯虛心引咎尚復嘵嘵置辯究屬不合相應請

旨將倉場侍郎朱嶠交部議處現在米石尚未驗收完竣
應請

飭下該侍郎仍責成坐糧廳及大通橋監督認真查驗如
有潮濕短少情弊即行嚴究懲辦所有臣等遵

旨確查緣由理合據實具奏伏乞

皇上聖鑒謹

奏咸豐二年五月二十四日奉

上諭前因朱嶠廻奏海運米石短少情形與戶部原奏兩
歧特派恩華彭蘊章前往查辦茲據奏稱查驗坐糧廳
公文清冊此項米石在天津不過蒸熟到通州始見潮

濕通州坐糧廳仍加風瞭始行驗收與該侍郎原奏據
經紀供稱河干未能挑晾以致轉運後米身收縮之語
不符其經紀在天津出結係屬向例該侍郎不得諉為
不知等語此次海運原為倉儲緊要權宜辦理若任聽
經紀藉端挑斥必致遲延貽誤該倉場侍郎自應通盤
籌畫以濟倉儲乃於倉米短少並不虛心引咎輒以天
津收驗為詞噉噉置辯實屬不合朱嶠著交部議處其
未收米石仍著責成坐糧廳及大通橋監督認真查驗
迅速轉運如有潮濕短少情弊即著嚴究懲辦餘依議
欽此

臣孫瑞珍臣慶祺跪

奏為海運南糧驗收全完恭摺奏

聞仰慰

聖懷事竊查江蘇省本年起運咸豐元年分蘇州松江常州鎮江太倉四府一州漕白糧米雇用沙船由海運津陸續進口挽抵天津上固水次臣等督飭各該員隨到隨驗一律趲辦所有起運漕白二糧米數先經臣等兩次奏報在案計自三月中旬開斛以來原報沙船八百七十三隻裝運漕白平斛糧米一百四萬六千二百五十五石八斗二升六合三勺承運經紀

隨正交倉耗米一萬五千九百九石八斗五升七合
五勺八抄統共漕白二糧並經紀耗米一百六萬二
千一百六十五石六斗八升三合八勺八抄現俱照
數查驗斛收一律乾潔內有沉失米三千一百九十
石按照奏定章程本應豁免經江蘇總局委員以倉
儲緊要自應備價收買沙船餘米抵補足額掃數全
完顆粒無虧計用官民撥船五千八十八隻酌分四
十八起兌裝前後跟接全數起運除撥運易州
陵糴白糧正耗米一千二百九十八石七斗三升六合七勺
一抄外其餘交倉漕白二糧及應撥薊州白糧共計一百

六萬八百六十六石九斗四升七合一勺七抄均經
起運赴通臣等查豐北漫口本年春間未能合龍河
運江浙江廣等省漕糧抵通自必較遲幸海運風帆
順利先有此百餘萬石漕白糧米早運通壩俾實倉
儲較之河運又復節省銀六十六萬兩以供撥用現
在前項漕白糧米一百六萬二千一百六十五石六
斗八升三合八勺八抄均經隨時解收全數撥兌北
較道光二十八年卸竣日期早完一月有餘辦理胥
歸簡捷是皆仰賴

聖主鴻福臣等欽幸難名再上兩屆海運每屆另備口袋

五萬條以為在津露囤及北倉截卸之用本屆並未
露囤亦未截卸毋庸另備口袋少此一項開銷計節
省銀一萬二千餘兩其上案預備截卸露囤蓆片繩
索等項亦即毋庸採辦以節經費而昭覈實所有臣
等驗收海運南糧事竣緣由理合恭摺具奏再臣等
於拜摺後即行率同隨帶司員起程回京恭覆

恩命合併聲明伏乞

皇上聖鑒謹

奏咸豐二年五月二十三日奉

硃批知道了欽此

臣孫瑞珍臣慶祺跪

奏為海運事竣謹將在津辦理收運尤為出力各員援

照

恩准成案恭懇

天恩分別獎勵仰祈

聖鑒事竊查道光二十八年七月初三日奉

上諭朱鳳標德誠奏海運事竣請將出力各員分別獎勵一

摺本年南糧海運前曾派朱鳳標等前往天津督飭各該
員妥為籌辦現在正漕全數兌收各該員等著有微勞自
應分別加恩以昭激勸委員江南淮揚道查文經直隸清

河道何耿繩天津道張起鵠署天津鎮總兵福珠洪阿均著交部議叙坐糧廳奎綬著交部從優議叙隨帶司員前湖北武昌府知府戶部員外郎上行走聯英著記名以道員用戶部候補主事董醇著遇有主事缺出儘先補用其天津府知府以下各員及由通調往之委員營委將弁並江南委員及佐雜各員均著咨明各該省督撫分別請獎朱鳳標德誠在彼數月督辦周妥均著交部議叙餘著照所擬辦理欽此欽遵在案臣等查本年辦理海運原因豐北未能合龍河運恐有阻滯並以軍需緊要擬將河運費用節省以供撥解所有海運一切經費必須樽

節支用方可絲毫不動

帑項尤在起運迅速免致露囤截卸之煩前經江蘇督撫酌擬章程由臣部逐款核議參酌時宜務為經畫嗣於三月內江南委員升任甘肅按察使蘇松糧道倪良燿等先後來津會同清河道譚廷襄天津道張起鵠專司其事坐糧廳毓鍾隨同臣等赴津與直隸江蘇兩總局公同商辦先撥該道等選委府縣丞倅次第整齊復經臣等逐加查察該道員等無不竭誠盡力恪謹將事其先期哨探乘潮迎護導引進口挽挑水次查驗米色監視斛收配給剝船疏通河道一切事

宜均須周妥而總理文案鈎稽冊檔撙節經費彈壓人夫加以預購餘米備抵缺額收發器械巡防盤詰需員恐多該府縣丞倅等均能明幹曉事晝夜辛勤臣等目擊各該員出力情形始終罔懈竇不敢壅於上

聞當此事竣之時謹照道光六年及二十八年兩屆鼓勵成案恭懇

恩施以昭激勸查陞任甘肅按察使蘇松糧道倪良燿總理交米事宜籌畫精詳力全漕額清河道譚廷襄天津道張起鵷經理一切均能隨時隨事悉心調度俾

克妥協歲事署天津鎮總兵大沽協副將特克慎來
往海口催提船隻親督將弁遠探近引厯著勤勞惟
係司道鎮將大員

恩出

聖裁未敢擅議優叙其天津府知府錢忻和署天津縣知
縣謝子澄各委員等及由通調津委員並營員將弁臣
等各按勞績咨明直隸督臣分別奏請獎勵江南委
員候補知府洪玉珩等認真籌辦經理周詳勸諭商
民耆舵水手胥遵約束其佐雜各員及督押糧米航
海委員亦均培矢勤奮昕夕不暇臣等亦照成案各

按勞績分別咨明江省督撫辦理再查前屆臣部隨帶司員二員及道光六年辦理海運隨帶四員均蒙

聖恩獎敘此次隨帶四員內郎中董醇一員上年兩次收買商米及前屆辦理海運均經隨帶赴津熟習情形該員才猷素著識力兼優本年以

京察一等蒙

恩記名以道府用此次帶同驗米亦能領袖同司辦理諸務悉臻妥善可否仰懇

天恩交軍機處記名遇有道員缺出請

旨簡放先換頂帶主事振麟候補主事王友端學習主事

成琦三員經臣等委辦一切均能潔已奉公始終其事不辭勞瘁查主事振麟係已補實缺人員可否仰懇

天恩留於臣部以員外郎儘先升用候補主事王友端由進士分部早經奏留可否仰懇

天恩遇有臣部主事缺出儘先補用學習主事成琦前在都察院筆帖式任內當差十二年有餘嗣由文進士簽分臣部在主事上行走已逾二年可否仰懇

天恩留於臣部以主事儘先補用以上各員實皆著有勞績臣等謹仰體

聖主激勵人材至意援案聲請恭候
聖裁伏祈

皇上聖鑒謹

奏請

旨

再查坐糧廳兩員內除汪潤一員駐通接收海運南
糧應照成案俟剝船起卸全完再由倉場衙門核辦
外其駐津坐糧廳刑部郎中毓鍾隨同臣等終日河
干逐船逐倉查驗米色督率經紀不辭勞瘁查上屆駐
津坐糧廳海運事竣蒙

恩交部從優議叙此次海運沙船連樁早到趕辦一切倍著辛勤該員係本年

京察一等人員可否邀

恩賞給道銜以示鼓勵出自

皇上逾格鴻慈謹

奏請

旨

咸豐二年五月二十三日內閣奉

上諭孫瑞珍慶祺奏海運事竣請將出力各員分別獎勵一摺本年南糧海運前曾派孫瑞珍等前往天津督飭

各該員妥為籌辦現在漕糧一百餘萬全數兌收各該
員等著有微勞自應分別加恩以昭激勸委員江南蘇松
糧道升任甘肅按察使倪良燿直隸清河道譚廷襄天
津道張起鵠署天津鎮總兵特克慎均著交部從優議
叙坐糧廳毓鍾著賞給道銜隨帶司員戶部郎中董醇
著交軍機處記名遇有道員缺出請旨簡放先換頂戴
戶部主事振麟著以員外郎儘先升用戶部候補主事
王友端著遇有主事缺出儘先補用戶部學習主事成
琦著留於該部以主事儘先補用其天津府知府以下
各員及由通州調往之委員營委將弁並江南委員

及佐雜各員均著咨明各該省督撫分別請獎孫瑞珍
慶祺督辦妥速均著加恩交部議叙餘著照所議辦理
該部知道欽此

協辦大學士直隸總督臣訥爾經額跪

奏為海運漕糧支用經雜各費循照歷屆成案請免報

銷恭摺奏祈

聖鑒事竊照本年海運蘇、松、常、鎮、太四府一州漕白米
一百六萬二千一百六十五石零自津運通應需剝
船水腳及一切經雜各費由江省解到九四平銀二
十三萬兩除剝解坐糧廳通倉協貼等銀一萬五千
三百兩實收銀一十一萬四千七百兩存留天津道
庫備用茲據清河道譚廷襄天津道張起鵷會呈稱
本年海運需用官民剝船水腳並苫蓋剝船席片溜

席筒以及民船守候口糧押運員弁兵役薪水飯食
迎護導引哨船弁兵口糧一切經雜各費經

欽差大臣督飭該道等會同江蘇委員撙節動用茲已事

竣該道等逐細勾稽覈實銷算並將收回苦艚席片
估計變價就款開除共用九四平銀一十一萬四千
六百九十四兩零折實庫平銀一十萬七千八百一
十二兩零尚餘九四平銀五兩零檢查道光六年海
運利價因動支漕項銀兩係報部之款是以造冊報
銷其一切經雜各費由江省在外籌款

奏明毋庸造報二十八年利價等銀江省係在津貼旗

丁幫費銀內撥解並非解部之款亦經奏明毋庸報部本年江省解到銀兩係照案在於應給幫費內籌撥應請

奏明毋庸報部覈銷仍分項造具細冊詳咨江省歸入商船水腳等項彙案辦理所有用賸銀五兩零查升任江蘇糧道倪良耀前因應解坐糧廳協貼等項銀兩不敷支解在於天津道庫借撥銀二千九百八十七兩零應將前項餘銀剋抵尚未還借墊九四平銀二千九百八十二兩零請咨江省解交歸款等情造冊會詳請

奏前來臣按款覆覈並檢查道光六年海運漕糧需用
剝價及一切經雜各費按米攤算每百石需銀十一
兩二十八年海運每百石需銀十一兩零本年每百
石需銀十兩零比較上二屆有減無增所有本年海
運動用銀兩江省係由外籌撥應請循照歷屆成案
免其報部覈銷仍將細冊咨送江省彙入沙船水腳
案內辦理借墊銀兩催解歸款外為此恭摺具

奏伏乞

主上聖鑒謹

奏咸豐二年八月十七日奉

硃批戶部知道欽此

協辦大學士直隸總督臣訥爾經額跪

奏為辦理海運出力人員遵

旨覈實保奏懇

恩分別獎勵仰祈

聖鑒事竊臣接准部咨咸豐二年五月二十三日奉

上諭孫瑞珍慶祺奏海運事竣請將出力各員分別獎勵
一摺本年南糧海運前曾派孫瑞珍等前往天津督飭
各該員妥為籌辦現在全數兌收各該員等著有微勞
自應分別加恩其天津府知府以下各員及由通州調
往之委員營委將弁並佐雜各員均著咨明該督分別

請獎等因欽此並准

欽差戶部尚書臣孫

倉場侍郎臣慶

將直隸所派

文武員弁並由通帶往各員銜名開單咨送到臣
仰見

聖主激勵人材微勞必錄之至意惟查單開共計一百五
十九員之多自應分別出力之等差核實辦理隨飭
總辦局務之清河道譚廷襄天津道張起鵬暨藩司
會同查明核議詳請

奏獎前來伏查本年辦理海運臣先期派委營員出洋
哨探迎護天津總局經管文案稽核支銷監視兌斛

調撥剝船押運米石催重償空事務較煩而沙船進口之事加以官民剝船二千數百隻水手人等一時匯集彈壓稽查尤關緊要當經分委員弁各司其事數月以來均能不辭勞瘁奮勉從公迅速藏事不無著有微勞仰蒙

聖恩准令分別請獎謹遵

旨擇其尤為出力文武二十三員請

旨分別鼓勵以昭激勵又出力稍次文武共三十二員並請

敕下部臣分別從優及量予議叙謹依次開單恭呈

御覽此外各員并由外存記容臣隨時酌量獎勵理合恭

摺具奏伏乞

皇上聖鑒訓示謹

奏咸豐二年六月二十八日奉

上諭訥爾經額奏遵保辦理海運出力人員一摺本年辦理海運直隸派委各員弁等或綜理文案或斛收監兌或調撥剝船或催償稽查均屬著有微勞自應分別獎勵天津府知府錢忻和廣平府同知鍾瑞天津縣知縣謝子澄新城縣知縣鄭士蕙宣化府經歷宋嵩慶天津鎮標葛沽營遊擊薛成龍大沽協左營都司吳璋均著以應升之缺升用候補知府金鐘著遇有本班應補缺

出儘先補用天津府海防同知候選知府高應元著以
知府歸部儘先選用清苑縣縣丞捐陞知縣汪鳴和著
開缺以知縣留於直隸歸候補班補用河工候補縣丞
捐升知縣於藩著以知縣留於直隸歸本班儘先補用
仍各照例捐足再行序補建昌縣巡檢捐升主簿陳克
昌著開缺以主簿留於北河補用捐班前先用按察司
經歷費德聲本班儘先補用縣丞於恒吉遇缺即補縣
丞劉傑河工本班儘先補用縣丞祥瑞河工分缺間用
主簿熊琦均著歸候補班先用候補府經歷龔煥候補
直隸州州判唐樹翼北河候補縣丞高維翰北河候補

從九品孫冬旭試用從九品盛祖培試用府倉大使汪
葆光均著儘先補用楊村通判厲維梁山海關通判烏
林泰即用知縣薩炳阿試用知縣吳應台葉增慶州同
銜天津縣縣丞王恒謙任邱縣縣丞倬滿卓異候升程
椿武清縣河西務主簿鄒在人霸保主簿朱浩良北河
遇缺即補從九品許忠阜平縣典史汪榕井陘縣典史
陳廷賡天津縣楊青驛驛丞楊承杰天津鎮標中軍遊
擊吳燦署天津鎮標城守營都司題升東明營都司毛
文藻大名鎮標長垣營都司白含章天津鎮標左營守
備梁運彰署天津鎮標右營守備阜城汛千總哈清魁

正定鎮標左營守備王恩洪天津鎮標大沽協左營把
總劉淳海口營把總王寶慶左營把總劉翼雲河間協
右營商家林汎把總沈鳳鳴大沽協左營外委楊殿臣
大沽協海口營外委杜來增景州營吳橋汎外委楊瑞
城守營外委王恩溶均著交部從優議叙東路同知吳
承祖通州知州佈彥海河主簿陞補故城縣縣丞鄭繼
勲天津縣葛沽巡檢樓東淇天津縣典史劉玉衡均著
交部議叙餘著照所擬辦理該部知道單併發欽此

為欽奉事咸豐二年九月十九日內閣奉

上諭陸建瀛等奏海運安穩護邀

神佑請加封號匾額一摺上年蘇州松江常州鎮江太倉四府一州漕白米石俱由海運該撫楊文定於督辦之初即叩禱

天后

風神

海神各廟虔求佑助嗣沙船先後放洋妥速抵津米石並無傷損

神靈默佑欽感良深著發帑藏香十柱交陸建瀛楊文

定祇領遣員分詣各處

神廟敬謹祀謝

天后屢彰靈應疊加封號此次海運利漕安瀾顯應尤著著禮部察例擬加封號候朕酌定並發去御書匾額交該督等敬謹懸挂以答

神庥其

風神

海神並著禮部一體擬加封號以昭靈貺欽此欽遵於十七日抄出到部十九日由廳發司前來相應抄錄

原奏恭錄

上諭行文兩江總督江蘇巡撫一體欽遵查照並知照禮部係如何擬

加封號務於擬定具奏後知照本部以憑查核暨移會稽查處稽察房戶科江南道可也